

# Wanita hamil tujuh bulan didakwa cuba rompak kedai emas

**MELAKA** - Seorang wanita mengandung tujuh bulan didakwa di Mahkamah Majistret Ayer Keroh di sini pada Jumaat, atas pertuduhan cuba merompak sebuah kedai emas di sebuah pasar raya, baru-baru ini.

Norraniza Muhamad Puslam, 35, yang menangis semasa pertuduhan dibacakan kepadanya, bagaimanapun mengaku tidak bersalah.

Dia didakwa cuba merompak Nur Rabeatul Addawiyah Rasul,

16, di Kedai Emas Daz Jewellery Mydin Ayer Keroh, pada pukul 4.45 petang, 20 Disember lepas.

Pertuduhan mengikut Seksyen 393 Kanun Keseksan yang memperuntukkan hukuman penjara maksimum tujuh tahun dan denda jika sabit kesalahan.

Timbalan Pendakwa Raya Fikri Hakim Zamri menawarkan jaminan sebanyak RM15,000 dengan dua penjamin.

Bagaimanapun peguam terduduk, Illya Shahar memohon

jaminan yang rendah memandangkan anak guamnya berpendapatan sederhana, mengandung dan mempunyai dua anak berusia 5 dan 2 tahun, selain masih menanggung ibu bapa dan seorang adik yang masih belajar di pusat pengajian tinggi.

Majistret Sharda Shienha Mohd Suleiman membenarkan Norraniza diikat jamin sebanyak RM4,000 serta menetapkan 10 Februari tahun depan bagi sebutan semula kes. - *Bernama*



**Norraniza (tengah) didakwa di Mahkamah Majistret Ayer Keroh pada Jumaat atas pertuduhan cuba merompak kedai emas.**